


sanjvwnz

Dauqngeix Gaiq Soujgaen



(ciep geiz gonq)
Dang gyoengqvunz yungh ceij-gaen yied daeuj yied lai seiz, gaxgonq yungh gij soujgaen haenx couh menhmenh daj ndaw saedcej gyoengqvunz siusaet bae lo. Ceijgaen baenz le cungj doxgaiq gyoengqvunz raeuz cungj noix mbouj ndaej ndeu. Lumj mwh gwn haeux, gwnz daizhaeux cungj baij miz ceijgaen, hawj vunz gwn haeux le uet fwngz uet bak, baez uet liux swnh fwngz gveng coh ndaw swx nyapnyaj bae, gawq fuengbienh boux yungh ceijgaen, youh fuengbienh boux baet ranz.

Yienznaeuz ceijgaen hawj gyoengqvunz raeuz daiq daeuj fueng-bienh gig lai, hoeng, ceijgaen hix hawj gyoengqvunz raeuz daiq daeuj vwndiz gig lai. Lumjnaeuz, seizneix raeuz byaij youq gwnzgai roxnaeuz gwnz loh, ciengzseiz yawjraen song henz gai roxnaeuz song henz loh dauqcawq miz vunz gveng gij ceijgaen gaenq yungh gvaq haenx, daegbied dwg gawjhengz gijmaz hozdung, giz miz vunz comzyouq lai haenx, cungj gveng miz ceijgaen uq haenx, mwngz baez mbouj siujsim, lajdin couh dieb miz gij ceijgaen uq gig dwgdaengz haenx. Ndigah, ceijgaen daiq hawj raeuz fuengbienh seiz, hix daiq mazfanz hawj raeuz gig lai.

怀念手帕

□Mungz Ningz/蒙 宁

Caiq gangj, danghnaeuz daj mbaetyungh nwngzienz daeuj yawj, ceijgaen sai bae nwngzienz gyoengq-vunz raeuz hix gig lai. Gyoengqraeuz cungj rox, ceij dwg yungh yiengfaex guh baenz, raeuz ngoenzngoenz yungh ceijgaen, danghnaeuz moix boux vunz moix ngoenz yungh bau ceijgaen ndeu, daengx guek raeuz cibsam ik vunz aeu

yungh cibsam ik bau ceijgaen, mbouj rox yungh bae geijlai gofaex lo. Daengx bi sam bak loegcib haj ngoenz, couh mbouj rox yungh bae geijlai gofaex lo. Bi bae bi daeuj, gofaex gwnz digiuz raeuz lijimiz geijlai hawj raeuz yungh ne? Danghnaeuz daengz seizhaenx, gwnzbya gwnzbo cungj ndoqndangndang bae, raeuz naengz

siengj ndaej daengz gwnzbiengz raeuz baenzlawz cingzgingj lwi?

Vihneix, raeuz miz haujlai lijyouz bae dauqngeix soujgaen. Danghnaeuz raeuz daj mbaet yungh nwngzienz bae ngeix, raeuz wnggai yungh soujgaen, danghnaeuz raeuz daj hag baenz veiswngh sibgven daeuj gangj, raeuz wnggai yungh soujgaen, danghnaeuz raeuz simlangh saekdi, raeuz wnggai yungh soujgaen. Soujgaen dwg ndaw ndwenngoenz gyoengqvunz raeuz cungj liz mbouj ndaej. Raeuz mbouj naengz yienghyienh cungj siengj yiengjsouh, yienghyienh cungj siengj fuengbienh couh dawz gij doxgaiq gaxgonq riuzhengz roengzdaeuj haenx gveng okbae, ceijgaen yienznaeuz ndei yungh, yienznaeuz yungh ndaej fuengbienh, hoeng ceijgaen dingj mbouj ndaej soujgaen, aenvih ceijgaen mbouj hawj gyoengqvunz raeuz daiq daeuj simlangh vuenyungz.

(sat)

Genhciz Dangj Guhdaeuz

坚持党领导

□Cungh Swmingz/钟自鸣

Genhciz dangj guhdaeuz
Saedcej raeuz hoengzcoq
Yaek saedyienh aen loq
Byaij diuz loh fouqgiengz

Loh gvangq nyaemh byaij ci
Namh biz ndei ndaem byaek
Vunz baihnanz baihbaek
Yaek gvaq ngoenz swyouz

Raeuz gyaez guekcoj ndei
Seiqseiz bonghyatytat
Ginghci daih hwngfat
Raeuz simndat guhhong

yienghyienh hengz minzcuj
Gaiqgaiq duj doxyaeng
Bouxdog gangj mbouj baenz
Caez yaeng ndei guhsaeh

Rap bwnh coq nazgyaj
Gogo maj doengzcaez
Cungguek aen biengz ndei
Bouxbox gyaez bingzdaengi

Gingqnieb sim cix anq
Bouxbox gangj naeuz ndei
Gag hong gag ndiepgyaez
Roengzrengz bae haenqguh

Mbouj hengzyak hengzmanz
Mbouj guh vang guh rae
Caez haeujsim haeujeiq
Guhsaeh gangj vwnzmingz

Vaiz miz duz byom biz
Loh miz hwnjroengz lingq
Boux banhsaeh goengcingq
Ndaej vunz gingq vunz gyaez

Lauxsaed sim cix gyaeu
Mbouj naeuz it guh ngeih
Yaeuh vunz yaeuh swhgeij
Gangj haeujcejij cij baenz

Huzndei guek maenh'ak
Mbwn lak cungj mbouj lau
Suijniz sa doxndau
Giet baenz gau maenhgenq

Cawj ngaiz gauq aen moj
Buhmoq baengh cik caiz
Fapceih guek ndei lai
Vunz baenz gvai baenz sienh

Ciengzseiz boux bang boux
Doxndei daeuj guh vunz
Caezcaez guh ndaej gwn
Daengxbiengz vunz huzsienh

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

Veiz Gozcingh vix deihdoz dwk, caezcienz gangj le Guengjsae yaek guh diuz goengloh reguek youz Gveilinz lohgvag diegbya baihsaebaek Guengjsae daengz Lungzbanh Cing-sih ndeu, raez gaenh cien goengleix, lohgvag Gveilinz、Liujcouh、Hozciz、Baksaek 4 aen digih. Gij dungzci goengdaeuz cunghyangh doiq aen hanghmoeg deng cwng guh “Hongloet 0539” neix, nyinhcaen ngeixyaeng, baecinj le gij fueng’anq Guengjsae neix. Veiz Gozcingh lij daezok, youq Guengjsae ciucomz bang vunzguhnaz bouxcoz, gyoebbaenz aen Bingduenz Hongloet Gaijfangginh ndeu, yungh daeuj coihguh gij goengloh reguek Guengjsae. Aen iugouz neix goeng-daeuz cunghyangh caemh doengzeiq lo. Guh diuz roen reguek neix, doiq henre diegnamz guekcoj, haifat dieg-bya baihsaebaek Guengjsae, cungj miz gij cozyung youqgaenj. Vunzlai dangdieg naeuz: “Diuz neix diuz roen baenzmiz ndeu!”

Veiz Gozcingh youq Baekging guh sat aen hongrap neix le, youh caeuq Gyauz Yaujgvangh、Cinz Ying-gih doxvuenh le gij yigen gvancez roengzmaenh cingsaenz hoih hong cunghyangh haenx, liuxle cij cienj bae Sanghaij guh fukcaz caeuq laebdaeb liuzyangj.

Mwh de youq Sanghaij liuz-yangj, de gaenbonj mbouj nyienh youq hoengq, ciengzseiz ngeixnaemj baenzlawz bae leihyungh gij rengzlig Sanghaij, caj bimoq hainduj guh gij giva 5 bi aen daih sam le, youq duenhhaenx doi gunghyez Guengjsae

hwnj gyaeklae moq bae.

De heuh boux cujyin Ginhveij Swcigih Gyangh Cuihbingz lingx 10 lai boux dungzci honghangz gunghgyauh daeuj Sanghaij ngonzyawj, hagsib gij gingniemh Sanghaij, caemhcaiq doxyaeng gij saeh caiqbaez daj Sanghaij senj cangj haenx. Mwhhaenx, de lai baez caeuq Gyangh Cuihbingz daengj vunz doxging le gij naemjfap de doiq mbefat gunghyez Guengjsae haenx.

De naeuz, gij giva 5 bi aen daih 3 Guengjsae, gunghyez ceiqniox yaek ndaej aen suijsingz bingzyaenz daengx

guek. Gij hanghmoeg fanzdwg guh moq haenx, caenhrengz caijyungh gij dinfwngz gunghyi caeuq sezbei ceiq senhein haenx. Gaej cungj gaen laeng vunz gyaep aeu, aeu gyaep caemh aeu mauh, miz mauhgvag cij ndaej gyaep dawz vunz. Gij hongloet fanzdwg miz diuzgienh ndaej cuengq haeuj hanghmoeg guekgya haenx, aeu hwnjheiq bae ceng. Ceng mbouj ndaej nei, couh aeu roengzrengz cauh diuzgienh, bonjfaenh gag naemj banhfap guh gij iq gonq, miz gij iq le gvaqlaeng dingh ndaej guh gij hung.

(caengz sat)